

ԵՂԻՇԵ ՄՈՎՍԵՍԻ ՄՈՎՍԻՍՅԱՆ

Եղիշե Մովսիսյանը ծնվել է 1899 թ. Վանում չքավոր ընտանիքում: Նա անցել է կյանքի դժվարին ուղի, որը լի է եղել զբկանքներով, դառնություններով և անսահման դժվարություններով: 1915 թ. գաղթել է Հայաստան և բնակվել Երևանում: Փրկվելով սուլթանական յաթաղանի ձանկերից, Հայաստանի արևաշող երկնքի տակ նա ապաստան ու երջանկություն գտավ՝ հասնելով գիտության փառապանծ բարձրունքներին:

Միջնակարգը ավարտել է Երևանում, 1922 թ.: 1922—26 թթ. եղել է Երեվանի պետական համալսարանի գյուղատնտեսական ֆակուլտետի ուսանողը և նրա երկրորդ շրջանավարտը:

1927 թ. անընդմեջ աշխատել է նաև պետական համալսարանի, ապա 1930 թ. Հայկական գյուղատնտեսական ինստիտուտի ագրոքիմիայի ամբիոնում՝ ասիստենտի, դոցենտի, գիտության դոկտորի և պրոֆեսորի, իսկ 1937 թ. մինչև իր կյանքի վերջը ագրոքիմիայի ամբիոնի վարիչի պաշտոններով:

1938 թ. գյուղատնտեսական գիտությունների թեկնածու, 1960 թ. գիտությունների դոկտոր, պրոֆեսոր, Աշխատանքային Կարմիր Դրոշի շքանշանակիր (1961 թ.), հանրապետության գիտության վաստակավոր գործիչ, հմուտ մանկավարժ ու գիտնական, որի գործունեությունը օրինակ է նրա հետևորդների համար:

Ե. Մ. Մովսիսյանը Հայաստանում գյուղատնտեսական կրթության և ագրոքիմիական գիտության հիմնադիր Պ. Բ. Քալանթարյանի երախտապարտ աշակերտներից էր և իր «Ագրոքիմիայի հիմունքները» ձեռնարկը նվիրել է նրա պայծառ հիշատակին:

Իր արժեքավոր հետազոտություններում գիտնականը լուսաբանեց մեր հանրապետության Արարատյան դաշտավայրի կարբոնատային հողերի կլանման ունակությունը և կլանված կատիոնների կազմությունը, կարբոնատների (Ca, Mg) խմբերը, մշակեց նրանց որոշման նոր մեթոդ, տվեց հումուսի որոշման կշռային և ծավալային եղանակները. որոշեց այդ հողերում ածխածնի և ազոտի հարաբերությունը և այլ հարցեր:

Ե. Մ. Մովսիսյանը 5 մենագրության, 65 գիտական հոդվածների և 25 պիստամասսայական գրքույկների հեղինակ է: Կյանքի վերջին տարիներին նա աշխատում էր հողերի կլանման ունակության և կլանված կատիոնների կազմության որոշման ունիվերսալ մեթոդի մշակման վրա, սակայն այն չավարտեց:

Վերջին տարիներին նա կազմակերպեց և հասարակական հիմունքներով ղեկավարեց բույսերի սննդառության կանխորոշման (գիազնոստիկայի) պրոբլեմային լաբորատորիան: Այդ լաբորատորիայում փորձարկեց գիազնոստիկայի հայտնի մեթոդները, հանձնարարականներ տվեց արտադրության մեջ կիրառելու և մշակեց նորերը՝ քիմիկո-ֆիզիոլոգիական և միկրո մեթոդները: Բույսերի սննդառության կանխորոշման այս նոր մեթոդները հրատարակված



են: Նա հրատարակության պատրաստեց «Պարարտացման փորձերի և կենսաբանական այլ հետազոտությունների մեթոդները ազրոքիմիայում» աշխատությունը, որը մեքենագիր վիճակում է:

Եղիշե Մովսիսյանը բազմաթիվ անգամներ մասնակցել է միութենական և հանրապետական գիտական նստաշրջանների, հանդես է եկել շրջաններում ու գյուղերում, մամուլում, ռադիոյով և հեռուստատեսությամբ՝ երկրագործության քիմիացման վերաբերյալ զեկուցումներով և զրույցներով: Ամենուրեք սլոպագանդել է հանքային և տեղական պարարտանյութերի կուտակման, պահպանման և արդյունավետ օգտագործման, գոմաղբամբարների կառուցման հարցերը:

Մեծ է Ե. Մ. Մովսիսյանի վաստակը գիտական և մանկավարժական կադրերի պատրաստման գործում: Նա ղեկավարել է ասպիրանտների (14), որոնք հաջողությամբ պաշտպանել են դիսերտացիաներ: Եղել է երեք գիտական խորհուրդների անդամ: Ղեկավարել է գյուղատնտեսության մինիստրության գիտության գլխավոր վարչության գիտական խորհուրդի «Ագրոքիմիա-հողագիտություն» սեկցիան: Նրա դաստիարակությամբ աճեցին ու բարձրացան գյուղատնտեսական գիտության և արտադրության բազմաթիվ ունակ և շնորհալի կադրեր:

Անգնահատելի է Ե. Մովսիսյանի վաստակը հատկապես Հայկական գյուղատնտեսական ինստիտուտում: Նրա բազմաթիվ սաներն այժմ շարունակում են նրա աշխատանքները գիտության և արտադրության մեջ, առաջ են տանում նրա սիրած գործը, գյուղատնտեսության քիմիացումը:

Մեր հանրապետության երկրագործության քիմիացումը՝ մեծ գիտնականի և մանկավարժի հիշատակի հավերժացումը կլինի: